



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCCCCXLVII. ad annum MDXXVII.

Parisiis, 1644

Vita Pii Papae II.

urn:nbn:de:hbz:466:1-15644

V I T A
P I I P A P Æ I I .

ANNO
CHRISTI
1457.

PIUS, Æneas Piccolomineus antea vocatus, communi-
onum consensu pontifex renuntiatur, Friderico
III. imperante, anno Domini 1457. vel secundum Onu-
phrium 1458. decimoquarto Kalendas Septembris. Hic,
cum adolescentiorem ætatem suam politioribus literis
informasset, paulo post quam e Senensis gymnasii studio
prodiisset, cum Dominico Capranica cardinale Basileam
venit, Concilioque ibidem celebrato, sacris ordinibus
necdum initiatus, per errorem non tantum tenacissime
adhæsit, verum etiam scriptis ad rectorem & vniuersita-
tem Colonensem dialogo & epistolis, eiusdem Concilii
auctoritatem approbavit. Manens Basileæ Felicem quin-
tum antipapam tamquam verum Christi vicarum vene-
ratus est. At cum Fridericus Romanorum rex Aquisgra-
ni coronatus, domum repetens, Basilea transitum fecis-
set, rogatusque Felicem illic præsentem accedere, eidem
que tamquam Romano pontifici honorem exhibere, aut
publice cum eo verba miscere recusasset, a sententia sua
erronea decidere incipiens, in aula imperatoris Frideri-
ci, cuius rogatu in familiam eius transiit, atque in ea ali-
quot annis permanxit, doctissimorum virorum imperato-
rem adeuntium conuersatione instructus, omniumque
cardinalium sese pontifici Eugenio submittentium exem-
pto motu, Romam venit, Basileense clericali tonsura
insignitus, in Austria cum minoribus ordinibus subdiacon-
atus & diaconatus sacros ordines recepit, in vrbe ad
presbyteratum, & postea per Callistum tertium ad car-
inalatum promotus, eidem mortuo, cum de successore
quereretur, & cardinales Bessarionem cardinalem
Græcum suffragarentur, eosque ab hoc eligendo Alani
cardinalis Auenionensis auertisset, quod indecorum
videretur Græcum euehere, quasi Roma viris sapienti-
simis doctissimisque careret, in pontificatu subrogatur.

Pius quan-
do pontifex
factus.

Pii II. virtus
& doctrina
qualis.

Pontifex factus primum belli incendium a Piccinino in Vmbria excitatum suppressit, Assisum & Nuceram recuperavit. Mantua conuentum regum & principum indixit, quo & ipse accedens, multis & principibus & legatis presentibus, de bello in Turcas suscipiendo constitutum est. Pius Romam reuersus, Viterbum se recepit, & ab ecclesiasticæ ditionis finibus tyrannos quosdam exterminauit. Regnum Neapolitanum Ferdinando confirmauit, & Latinum cardinalem Vrsinum eo misit, qui eumdem regem coronaret, quem etiam in clade illa quæ apud Sarnum afflictus est, adiuit: qua ope is regnum tutatus est. Sigismundum Malatestam & censuris & armis cohibuit. Fœdus iniit cum rege Hungariae, Burgundiæ duce, Venetisque, pro bello orientis, pro quo & ipse, in varias regiones tendens, magnos labores tulit. Regem Bohemiae citari iussit. Episcopum Moguntinum non recte de fide sentientem dignitate spoliauit. Sigismundum Austriae ducem anathemate damnauit, quod cardinalem quemdam in vincula coniecerat. Ludouico Gallia regi de ecclesiastica libertate detrahenti audacter restitut. Borsum Mutinæ ducem acriter interminatus est, quod rebus Galliae & Sigismundi Malatestæ velut ecclesiæ hostis faueret. Affinitatem cum Ferdinando rege contraxit. Beatam Catharinam Senensem inter sanctas retulit. Romæ, Senis, & aliis plerisque locis multa eleganter magnificeque extruxit. Corsinianum ciuitatem appellari voluit, & de suo nomine Pientiam dixit. Obiit Anconæ febri absumptus septimo Kalendas Septembris, anno Domini 1464. decimaquinta Augsti, cum sedisset annos sex, menses undecim, & dies vigintiseptem. Corpus Romam delatum, apud sanctum Petrum conditum est. Pius multa ingenii sui monumenta edidit, dialogos, epistolas, orationes diuersis personis, Bohemorum historiam; commentarios de suis rebus duodecim libris complexus est: epigrammata, variaque poematum genera lepide & acute scripsit: quo studio ita delectatus est, ut poetæ nomen etiam in suis ipse scriptionibus usurparet, ut constat ex epistola quadam ad parentem data, cui inscriptum est: Æneas Silvius poeta genitori suo Silvio salutem. Auri diuinarumque contemptor fuit: adeo

vt

Catharinā
Senensem
canoniza-
uit.

BVLLA RETRACTATIONVM. 9

vt cum oblati ei essent thesauri a Callisto relicti, videre recusans dixerit: Auferte hæc: citius enim expendemus, quam alii congeßerint. Eius virtutes a Platina immensæ propemodum enumerantur. Id vero nullatenus prætermittendum, quod generofa quadam indole ignoscebat, neque vnquam in eos animaduertit, quorum in se maledicta aliqua accepisset.

ANNO
CHRISTI
1463.
PII PAPÆ II. BVLLA
RETRACTATIONVM OMNIVM,

Dudum per eum in minoribus adhuc agentem, pro Concilio Basileensi, & contra Eugenium summum pontificem scriptorum.

Pius episcopus, seruus seruorum Dei, dilectis filiis, rectori & universitati scholæ Coloniensis, salutem & apostolicam benedictionem.

IN minoribus agentes, nondum sacris ordinibus initiati, cum Bafileæ inter eos versaremur, qui se generale Concilium facere, & vniuersalem ecclesiam repræsentare aiebant, dialogorum quedam libellum ad vos scripsimus, in quo de auctoritate Concilii generalis, ac de gestis Basileensium & Eugenii papæ contradictione, ea probauimus vel damnauimus, quæ probanda vel damnanda censuimus: quantum capiebamus, tantum defendimus, aut oppugnauimus: nihil mentiti sumus, nihil ad gratiam, nihil ad odium retulimus. Existimauimus bene agere, & recta incedere via: nec mentis nostræ aliud erat obiectum, quam publica utilitas & amor veri. Sed quis non errat mortalis? Sapientem inquiunt philosophi nunquam errare: verum est. At quis sapiens, nisi bonus? quis bonus, nisi solus Deus? *Omnes declinauerunt, simul inutiles facti sunt: Lue. 18. Psalm. 13.* non est qui faciat bonum, non est usque ad unum, inquit Prophetæ regius. Declinauimus & nos ab utero matris, errauimus in iniuio, & non in via: ambulauimus in tenebris, & procul a vera luce recessimus: nec nobis tantum errauimus, alios quoque in præcipitium traximus, & cæcis ducatum præbentes cæci, cum illis in foueam recidimus. Fortitan & aliquos ex vobis scripta nostra decepere, & de via Concil. Tom. 34.

B

PII PAPÆ II.

10

deduxerunt: quorum sanguinem si de manibus nostris requisierit Dominus, non habemus quod respondere possumus, nisi nos, vt homines, peccauisse, qui arbitrantes reatum iter ostendere, obliquum monstrauimus. In misericordia tantum Dei spes nostra sita est, quæ super omnia opera eius elucet. Sed haudquam satis fuerit diuinam misericordiam implorare & dicere: Parce Domine, parce peccatis nostris: nisi pro viribus vulnera quæ infliximus, veritate curare annitamur; & sicut est in fabulis, sagitta quæ vulnerauit, afferat opem: siue vt canit ecclesia, Medelam inde ferat hostis, vnde laferat. Mortem quidam prius sibi consciuerint, quam videri velint aliquando male sensisse: & nonnulli ne vel ad horam videantur errasse, semper errant; & dum vel minimam tolerare honoris iacturam nequeunt, totum abiiciunt, & perpetua notantur infamia, & in pessimas prolabuntur hæreses: qui ne apparent inconstantes, pertinaces efficiuntur. Superbissimi hoc agunt, qui videri dii, non homines, volunt: quales Constantiæ combusti sunt nostra ætate in magno conuentu Hieronymus & Ioannes hæresiarchæ. Nos homines sumus, & vt homines errauimus: neque imus inficias, multa quæ diximus, scripsimus, egimus, damnari posse: verum non vt Arius, Eutyches, Macedonius aut Nestorius, & alia blasphemorum turba, ex animo damnata viam elegimus: seducti peccauimus, vt Paulus, & ignoranter persecuti fuimus ecclesiam Dei, & Romanam primamque sedem. Propter quod prostrati ante oculos diuinæ pietatis, supplices oramus: *Delicta iuuentutis meæ & ignorantias ne memineris, &c.* Pudet erroris, pœnitent male fecisse, & male dictorum scriptorumque vehementer pœnit: plus scripto quam facto nocuimus. Sed quid agamus? scriptum & semel emissum volat irreuocabile verbum. Non sunt in potestate nostra scripta, quæ in multis inciderunt manus, & vulgo leguntur. vtinam latuissent quæ sunt edita. Nam si futuro in sæculo manserint, & aut in malignas mentes inciderint, aut incautas, fortasse scandalum parient. Qui hæc scripsit, inquiet, in beati tandem Petri cathedra sedit, & Christi saluatoris vicariatum gessit. Ita scripsit Æneas, qui postea summum pontificatum adeptus, Pius II. appellatus est, nec inuenitur mu-

Psalms. 24.

tasse propositum. Qui eum elegerunt, & in summo apostolatus vertice collocarunt, ab iis scripta eius approbata videntur. Verendum est, ne talia nostris aliquando successoribus obiiciantur, & quæ fuerunt Aeneæ, dicantur Pii, atque ab ea sede auctoritatem vendicent, aduersus quam ignoranter latrauerunt. Cogimur igitur, dilecti filii, beatum Augustinum imitari, qui, cum aliqua in suis voluminibus erronea inseruisse, retractationes edidit. Humilis & probatissimi vir ingenii, qui suas ineptias verecunde confiteri ac corrigere, quam impudenter defendere maluit. Idem & nos faciemus: confitebimus ingenuæ ignorantias nostras, ne per ea quæ scripsimus iuuenes, error irrepat, qui possit in futurum apostolicam sanctam sedem oppugnare. Nam si quem decuit vñquam Romani primique throni eminentiam & gloriam defendere ac extollere, nos illi sumus, quos sine vllis meritis pius & misericors Deus sola dispensatione sua ad beati Petri solium, & dilectissimi filii sui Domini nostri Iesu Christi vicarium euocauit. Quibus ex rebus dilectiones vestras hortamus, & in Domino commonemus, ne prioribus illis scriptis inhæreatis, aut fidem vllam præstetis, quæ supremam apostolicæ sedis auctoritatem quoquis pacto elidunt, aut aliquid adstruunt, quod sacroſancta Romana non amplectitur ecclesia. Suadete omnibus, vt id solium præ ceteris venerentur, in quo saluator Dominus suos vicarios collocauit, & quod beati apostoli Petrus & Paulus suo sanguine dicauerunt: nec putetis diuinam prouidentiam quæ cuncta gubernat, & nihil neglit eorum quæ creauit, inordinatam reliquisse militarem ecclesiam, quæ cum sit sponsa Christi, profecto a Deo est, & ordinem habet, dicente Apostolo, quæ sunt, a Deo ordinata esse. Requirit autem ordo, vt inferiora a superioribus gubernentur, & ad vnum tandem perueniatur tamquam principem & moderatorem cunctorum quæ infra se sunt. Sicut grues vnam sequuntur, & in apibus vnuſ est rex: ita & in ecclesia militanti, quæ instar triumphantis habet, vnuſ est omnium moderator & arbiter, Iesu Christi vicarius: a quo, tamquam capite, omnis in subiecta membra potestas & auctoritas deriuatur, quæ a Christo Domino Deo nostro sine medio in ipsum influit. Nec profecto in alium,

Concil. Tom. 34.

Rom. 13.

B ij

PII PAPÆ II.

12

tamquam sui exercitus ducem, supremam auctoritatem Christus principaliter deriuasset, quam in suum vicarium, qui primus fuit Petrus, cui commissam nouimus dominici gregis curam. Nec duos pluresve Petros euangelista commemorant, nec duos aut plures instituit Dominus, qui suum locum tamquam capita tenerent aequalia: sed vnum constituit, vt verticem ac ducem & pastorem

Matth. 16. vniuersi gregis, Simonem Petrum, dicens: *Tu es Petrus, & super hanc petram ædificabo ecclesiam meam: & tibi dabo claves regni cælorum; & quodcumque ligaueris super terram, erit ligatum & in cælo: & quodcumque solueris super terram, erit solutum & in cælo.* Et, *Pasce oves meas.* Quæ nulli alteri seorsum dicta leguntur, nisi Petro, vt in Petro vnitas & summa contineretur auctoritas. Nec alias a petra dictus est Petrus, nisi Simon: vt intelligeremus vnicum esse vere & solidæ petræ, id est Christi (vt Paulus exponit) locum tenentem, Simonem Petrum, qui solus pro Domino in periculo constituto exemit gladium. Petrus igitur,

& successores eius Romani pontifices primatum in ecclesia tenuerunt; & nos hodie, quamvis indigni, sola Domini voluntate digni tenemus: & quicumque Romanæ secundum canonicas sanctiones præficitur ecclesiæ, quamprimum electus est in sacro collegio, supremam a Deo potestatem sine medio consequitur, & per ordinem in omnem diffundit ecclesiam, cuius peccata diuino iudicio punienda relinquuntur. Si quid aduersus hanc doctrinam inuenieritis aut in dialogis, aut in epistolis nostris, quæ plures a nobis sunt editæ; aut in aliis opusculis nostris, (multa enim scripsimus adhuc iuuenes) respuite atque contemnите: sequimini quæ nunc dicimus, & seni magis quam iuueni credite, nec priuatum hominem pluris facite quam pontificem. Æneam reiicie, Pium recipite. Illud gentile nomen parentes indidere nascenti: hoc Christianum in apostolatu suscepimus. Dicent fortasse aliqui cum pontificatu hanc nobis opinionem aduenisse, & cum dignitate mutatam esse sententiam. Haud ita est, longe aliter actum. Audite, filii, conuersationem nostram: breuis narratio erit, quæ vobis, quantum ad rem attinet, veritatem aperiet, & obiectioni faciet satis. Anno salutis primo & trigesimo supra millesimum quadringentesimum, cum

Ioan. 21.

I. Cor. 10.

Dominico Capranica, quem Martinus quintus in secreto consistorio cardinalem creauerat, Eugenius IV. spreuerat, Basileam petiuimus, ibique Concilium inchoatum inuenimus, verum ab Eugenio reuocatum, quamuis congregati noluerant obedire, afferentes iam incepsum Concilium, sine consensu patrum qui conuenissent, haudquam potuisse dissolui. Iulianus aderat sancti Angeli cardinalis, natione Romanus, moribus & doctrina conspicuus. Is, cum ceteris praestaret, audita Eugenii reuocatione, praesidentiam dimisit, tamquam summo pontifici vellet obedire: sed cum augesceret in dies, Eugenio vel in uito, Concilium, & multi ex diuersis regionibus episcopi & regum legati aduentarent, cardinales quoque ex Romana curia profugi in dies nonnulli concurrerent, praesidentiam resumpsit, & auctoritatem Concilii mirum in modum extollens, eminentiam primae sedis supprimere coepit. Venientes Eugenii legatos, & potestatem Romano-rum praesulum magnificantes, apparenter confutauit: &, cum esset facundissimus, facile persuasit auditoribus quæ cupiebat. Cardinales ex vrbe profecti, Eugenio infensi, vitam eius moresque carpebant. Accedebant in horas cateruatum noui curiales, qui (vt est omnis multitudo male-dica, & inimica principi) Eugenii nomen modis omnibus lacerabant. Nos, qui ex patria iuuenes, non ex Vrbe illuc migraueramus, & noua tum primum ausi ex Senensi gymnasio euolaueramus, rudes & inexperti, vera esse arbitrabamur quæcumque dicebantur; nec putabamus mentiri alios, qui nesciremus ipsi mentiri, atque, vt est innatum homini, tetra & horrenda crimina odio habebamus: nec Eugenium diligere poteramus, quem tot tanti-que testes indignum pontificio dicerent. Aderant legati Parisiensis scholæ, cuius est fama percelebris: adfuerunt & aliquando vestri & aliorum studiorum Germanicæ na-tionis oratores: & vno cuncti ore Concilii generalis auctoritatem ad cælum efferebant. De potestate Romani pontificis pauci erant qui loqui praesumerent: omnes qui publice loquebantur, prurientes auribus, multitudini applaudebant. Accessit & ipsius Eugenii consensus, qui dis-solutionem Concilii a se factam reuocauit, & progressum eius approbauit, cum reconciliata Synodus Eugenio vide-

retur, & pax ecclesiæ data. Præterita enim omnia per * suas ^{* ad. duas} literas Concilii patres Eugenio sese remissuros, & pedes eius tamquam beati Petri exosculaturos promiserant, si reuocata dissolutione, Concilio cursum permitteret, atque illi cohæreret. Nouæ intercessere discordiae, tum aliis de rebus, tum potissime super translatione Concilii Græcorum causâ in alium locum. Eugenius in Italia non sine ratione Concilium petebat: popularitas synodalis transire montes horrebat, & in Auenione, aut in Sabaudia locum desiderabat. Adiuerunt per id temporis duo viri ex Italia Basileense Concilium, Nicolaus Panormitanus archiepiscopus, & Ludouicus Pontanus apostolicæ sedis notarius, Alphonsi magni regis oratores, qui velut duo orbis fidera, ceu pontificii iuris & totius ciuilis sapientiae duo præcipua lumina & clarissima censemabantur. Hi dictis scriptisque Concilii gesta probabant, Eugenii facta damnabant: nec erat qui aut vellet, aut auderet dicta eorum refellere. Quid ageremus? audire potuimus, non discere? Rude nimis ingenium est, quod per singulos dies auditæ & inculcata non capit. Quales magistri sunt, tales discipuli euadere solent. Paucos inuenias Aristoteles, qui Platonica norint destruere dogmata. *Non est discipulus supra magistrum*, inquit Dominus: nec nos magistrum potuimus superare. Iulianus nobis, & Nicolaus, & Ludouicus, & alii complures fuere magistri, schola Basileensis conuentus, in quo raro aliquis Eugenii causam defendit. Aduersus Concilii dignitatem mutire aliquid, crimen hæresis fuit. Vna omnium vox Concilium Eugenio præferebat: de sedis apostolicæ præcellentia, aut silentium, aut contemptus. Concilium, Concilium cuncta sonabant. Didicimus ergo quæ audiuimus, & post aliquot annos existimantes nos aliquid esse, diximus, vt est apud Satyricum,

Iumentalis. Semper ego auditor tantum? nunquamne reponam?

Puduit semper discipulum agere, subtraximus ferulæ manum, coepimus loqui, & magistri personam induimus. Scripsimus epistolas & opuscula: hoc omnibus passim datur: docti & indocti scribunt: & quæ scripsit ipse, nemo contemnit, nisi editionis feruorem tempus extinxerit. Nobis placebant scripta nostra more poetarum, qui poemata sua tanquam filios amant. Nec Basileæ quemquam

BVLLA RETRACTATIONVM. 15

inueniebamus, qui ea damnaret: probant enim similia si-
miles. Applaudebamus nobisip̄sis, & in editionibus nostris
gloriabamur: & quamquam postea Eugenius Concilium
in Italiam transtulerit, & cum Gr̄cis Ferrariæ, ac de-
mum Florentiæ conuenerit: quamquam Julianus sancti
Angeli & Ioannes sancti Petri cardinales, quibus pluri-
mum credebamus, ad Eugenium defecissent: quamquam
paucissimi in fide Basileensi remanissent, noluimus tamen
cedere, existimantes cunctos qui abibant, metu recede-
re, ne bona temporalia perderent: & cum nihil habere-
mus, quod nobis auferri posset, perseverandum putauim-
us, ne partem quæ verior nobis apparebat, relinquen-
tes, detrimentum animæ faceremus. Mansimus igitur Ba-
filex, quoad Eugenio, vt credidimus, iusto iudicio depo-
sito, Amedeus Sabaudiensis suffectus est, & Felix quintus
appellatus: quem non vt idolum (quod erat) sed tamquam
verum Christi vicarium venerati fuimus, nihil ad hæc si-
nistri putantes intercessisse. At cum Fridericus Romanorum
rex Aquisgrani coronatus, domum repetens, Ba-
filea * transitum fecisset; rogatusque Felicem illic præsen-
tem accedere, nullo pacto persuaderi potuisset, vt hono-
rem ei tamquā Romano pontifici exhiberet, aut publice
cum eo verba misceret: tum primum considerauimus pos-
sibile esse, quod partem erroneam sequeremur, quando
rex, imperator Romanorum futurus, in tanto negotio
dubius esset, & ad Eugenium inclinaret magis. Multum
& s̄pē inter nosip̄sos cogitauimus, quis esset modus in-
ueniendi verum. Nunquam enim volentes errauimus.
Rogati in familiam Friderici transire, non renuimus. Erat
tunc ille cum tota fere Germania neutralis. Concilium Ba-
filex dicebant esse Germani, & idolum eius respuebant:
Eugenium Christi vicarium appellabant, & Concilium
ab eo celebratum recusabant: nec Eugenio, nec Basileensibus
plene obediebant. Placuit ad neutrales transire,
vt verum apud eos liberius audiremus; & si receden-
dum esset ab uno extremorum, per aliquod medium trans-
iremus ad alterum: & eorum iudicium spectaremus,
qui non essent affecti causæ. Mansimus in aula Friderici
pluribus annis, illic varias audiuiimus opiniones. Neu-
tralitatem idcirco Teutones induerant, vt concordia fa-

Nota testi-
monium de
Amedeo.

*iter

cilius inueniretur , non ex consilio Solonis, qui tumul-
tuante ciuitate extorrem fecit eum qui sine parte reman-
sit. Multa inter neutrales didicimus , quæ nos antea late-
bant. Eugenium falso de multis accusatum inuenimus ,
cardinales qui Basileam venerant , ob priuatas inimici-
tias bono & sancto viro notam inurere voluisse : qui ta-
men cuncti postea ad eum redierunt , & veniam errati
petierunt. Forte per id tempus Julianus sancti Angeli car-
dinalis , cuius supra meminimus , ex Hungaria , quæ sibi
decreta contra Turcas fuerat prouincia , Flauianum ve-
nit , (quæ hodie Vienna dicitur) præcipuum Austriae col-
lumen. Sæpe cum eo sermonem pro veteri consuetudi-
ne miscuimus , sæpe de rebus Basileensibus disputauimus.
Tuebamur antiquam sententiam , ille nouam defende-
bat : extollebamus generalis Concilii auctoritatem , ille
apostolicæ sedis potestatem magnopere collaudabat :
dicebamus Concilium Basileense iure perseuerasse , quam-
uis Eugenius præsidentes reuocasset , & hoc eius factum
accusabamus : ille dissolutum seu translatum rite Con-
cilium affirmabat , & Basileensium opera multis modis
detestabatur , Basileæque non Synodum ecclesiæ , sed fa-
tanæ & ministrorum eius synagogam remansisse dice-
bat. Diutina fuit inter nos concertatio , verum mode-
sta & caritate plena. Ad extremum cum suis scriptis di-
ctisque cardinalem vinceremus , premeremusque vehe-
menter , subridens ille , Tu , inquit , Aenea tabellis obsigna-
tis agis mecum : & quoniam aliquando sensimus ut dicis ,
idcirco & hodie idem putas debere sentire , & addictos
priori sententiæ censes. Verum propterea nos sumus li-
beri , quia mutare sententiam usque ad mortem possu-
mus. Cur enim non liceat omni tempore , relicto falso , ve-
rum amplecti ? Fateor me dixisse & scripsisse quæ refers ,
verum a vero remotum errasse. Attu , qui , ut ait , me do-
ctore Basileensibus credere adductus es , errantem olim
secessatus es , cur modo non sequeris recta monentem ? Præ-
sumpsi de meipso , dum essem Basileæ , nimis ; quamuis de-
ceptus decepi , & credens prodesse , nocui , in medio ecclie-
siæ docens quæ non didici : cæcus erravi , & in tenebris am-
bulavi : reliqui tandem ecclesiam malignantium , & cum
impiis sedere recusavi. Reuelauit Dominus oculos meos ,
&

& considerauit mirabilia de lege sua. Cognoui priorem errorem , & quantum a vero procul abiissent Basileenses , plane intellexi. Adii Romanam curiam , & Eugenio , * cui fuisse rebellis , submisit ceruicem : a quo misericordiam consecutus , ad vniōnem Græcorum nauauit operam : & illis Romanæ ecclesiæ reconciliatis , aduersus impios Turcas legationem accepi. Castigans castigauit me Dominus , & morti non tradidit me , sed humiliatum exaltauit : quia cognito in errore non perseueraui , sed mox in viam redii , & ex magistro factus discipulus , ex magno paruuus , expurgato veteri fermento , nouum hominem indui , & veræ matris lacte nutritus , ad fontem veri perueni , quem sancti doctores ostendunt Græci & Latini , quorum vna vox est , saluari non posse , qui sanctæ Romanæ ecclesiæ non tenet vnitatem : omnesque illas virtutes mancas esse ei qui summo pontifici obedire recusat , quamuis in sacco & cinere iacens , dies & noctes ieunet & oret , & in ceteris videatur legem implere : quia melior est obedientia quam victimæ , & omnis anima potestatibus sublimioribus subiecta est : & Romanum præsulem in ecclesiæ vertice constitutum esse constat , a quo nullam ex ouibus Christi exemptam nouimus. Ego ad ouile redii , qui diu erraueram extra caulas , & pastoris Eugenii vocem audii. Tu si sapias , idem facies. Hæserunt pectori nostro verba * viri , quæ sæpe ad nos * vitez , repetiuit non sine caritate ardenti & amore singulari. Interea ex diuersis regionibus homines doctissimi Cæsarem adierunt , quibuscum placidos de eisdem rebus miscuimus sermones , semper ad verum intenti , cuius est natura hominis audita. Multum profuit nobis Ioannes Carauialis apostolici palatii auditor , natione Hispanus , qui Iuliano defuncto , in titulo cardinalatus ac legatione successit : quo cum sæpe de Concilio Basileensium amice disputauimus. Nemo doctus ad imperatorem venit , quem de his rebus in colloquium non adduceremus. Cumque Cæsar ad vniōnem ecclesiæ procurandam in Nurimberga suæ nationis conuentum instituisset , decreuissetque summum pontificem adhortari , vt Constantiæ nouum Concilium indiceret , legatumque mittere , ac Basileenses pariter induceret , vt eo se transfer-

Concil. Tom. 34.

C

rent, vt ibi pax ecclesiæ redderetur; primi Basileenses recusauere. Quod audiens Thomas Affelbachius ex Germania insignis theologus, Nunc, inquit, scio Basileenses Spiritum sanctum non habere ductorem, quando tam æquam imperatoris legem effugient. Idem multi alii dixerunt viri doctissimi & opinione sanctitatis illustres. Quibus consideratis, caligo tandem ab oculis nostris cecidit, quæ velut aranearum tela verum cernere impedit. Recognouimus errorem nostrum, venimus Romanam, Basileense dogma reiecamus, Eugenio pontifici maximo caput submisimus, & reconciliati ecclesiæ Romanæ, doctrinam eius imbuimus, & illud Hieronymi diximus: Ego nullum præmium nisi Christum sequens, beatitudini tux, id est, cathedræ Petri, communione confocior. Super illam fundatam ecclesiam scio. Qui cumque extra hanc domum agnum dominicum comedenter, profanus est: si quis in arca Noe non fuerit, peribit regnante diluvio. Eramusque adhuc pene laici, quando ad Eugenii obedientiam rediuiimus. Ex Basilea clericali tantum charactere insigniti recessimus, nec unquam sacerdos imbuimus ordines, nisi post veritatem cognitam, Basileensi cætitate relicta. In Austria minores ordines ac subdiaconatum & diaconatum recepimus: in Vrbe ad presbyteratum peruenimus. Hæc est conuersatio nostra, per hos gradus e tenebris ad lucem migrauimus: Ad quam rem non parum luminis nobis attulit Thomas

[†] Sarzanus legit Platina.

[†] Sarzanus theologicæ sapientiæ celebratus ac acutissimus interpres, qui postea in summo collocatus apostolatu, Nicolai V. nomen accepit. His auctoribus vnam ecclesiam catholicam & apostolicam esse didicimus matrem omnium fidelium, extra quam non inuenitur salus, sponsam Christi immaculatam, in qua omnes qui militant, finem sibi proponunt vitam æternam. Idcirco enim in ecclesia militanti laborant homines, & cum dæmonibus tamquam hostibus pugnant, vt pacem tandem assuantur, & cum Iesu magistro ac legifero suo in cœlesti Ierusalem triumphare ac regnare possint. Hic finis Christiano proponitur, huc omnes ecclesiæ militantis conatus, omnes leges, omnes regulæ tendunt. Et quoniam ecclesia quidam exercitus est Deo militans, terribi-

lis ut castrorum acies ordinata dicitur: vni procul dubio imperatori subiecta, ad cuius nutum cuncta referuntur. Cumque pius ac maximus & optimus Deus in suo sanguine fundauerit ecclesiam, eamque voluerit ad finem usque saeculi perdurare: quis non dixerit in ea id regimen institutum esse, quod optimum censeretur? At vero inter genera gubernationum communis philosophorum sententia est, praestare monarchiam: & Romani, quorum toto micuit orbe dignitas, quamuis electis regibus duos annuos consules elegerunt, & modo tribunos addidere, modo alios magistratus inuenere: in aduersis tamen casibus, bellisque grauioribus ad unum aliquem recurrerunt, virtute & auctoritate prstantem, quem dictatorem appellauerunt, cuius dicto non liceret aduersari. & quamquam dictaturam ab initio temporaneam instituerunt, in Iulio tamen & successoribus eius perpetua effecta est. Nec unquam Romana res admirabilior aut celsior fuit, quam sub Augusto Cæsare, quando iam clausis Iani portis totus fere orbis sub unius hominis gubernatione quieuit. Quo tempore natus mundi Salvator monarchicum regimen ceteris prætulisse videtur gubernationibus. Idem probat totius fere orbis consuetudo, cuius maximam partem gubernant reges, siue Christians intueamur, siue barbaros. Et quamvis ciuitates aliquot reperiantur, quæ cum maxime seruant, liberas se vocant, sine rege viuentes: non possunt tamen effugere, quin unum præferant aliis, eique tamquam capit pro tempore obedient. Quid plura? cœlestis aula nos admonet. Quid illa pulcrius? quid ordinatus? quid maius aut durabilius? quid melius aut beatius? Quamvis in ea & angelorum diuersi sint ordines, & sanctorum spirituum innumerabiles chori, unus est tamen omnium rex æternus Deus, qui condidit uniuersa, & nihil negligit eorum quæ condidit: cuius filius unigenitus Christus Iesus, cum pro nostra salute venisset in hunc mundum, seruili accepta forma, ecclesiam de qua loquimur, in cruce patiens, suo sanguine acquisiuit, & in ea usque in diem ascensionis corporaliter præsedidit, & tamquam dux verus & imperator cuncta in finem suum direxit. Et cum ascendisset in celum, eum indubitanter sui gregis pasto-

Concil. Tom. 34.

C ij

*Ioan. 21.
Act. 16.*

rem reliquit, cui dixerat: *Pasce oves meas. &c., Tibi dabo dāues regni cælorum.* Neque enim dixit, & non fecit, qui solus est verax. Grex Christi, ecclesia est. Pastor primus ipse Christus fuit, & pastor bonus, qui posuit animam suam pro ouibus suis. Secundus pastor Petrus extitit, ab ipso Domino institutus, atque omni potestate donatus, quæ ad bene regendum commissas oves necessaria dicitur. Alioqui Christus qui sapientia Patris est, & omnino sapienter egit, ecclesiæ suæ haud sufficienter prouidisset: quod est nefarium asserere. Et quamuis plures per orbem ecclesiæ institutæ fuerint, & plures episcopi, id est, plures greges, & ouilia plura, & pastores plures: omnes tamen sub vno pastore & in vno grege atque ouili continebantur, sicut & hodie continentur: quia vnum est Christi thalamus, vna sponsa, vnum ouile, & vnum pastor, & omnium episcoporum vnum episcopus Romanus præful, beati Petri successor, & Iesu Christi vicarius. Petrus enim in Antiochia primum sedet, deinde Romam venit. Vnde cum persecutionem fugiens vellet abire, a Domino prohibitus est, & hic glorioso martyrio vitam finiuit, successore Clemente * substituto. Atque ita in hanc usque ^{* insti-} diem seruatum est, ut qui Romæ federit antistes rite institutus per legitimum electionis tramitem, tamquam Aaron vocatus a Domino, hunc omnes Christianæ plebes, omnes populi, omnes reges, omnes clericos, omnes episcopos tamquam Iesu Christi vicarium, & beati Petri successorem, vniuersalis ecclesiæ caput ac rectorem & ducem venerati sint. Inter quos plurimi pro Christi nomine ^{* a-} sperrimos perpessi cruciatus, & morte mulctati, coronam martyrii suscepérunt. Plurimi confessores egregii, vita, moribus & doctrina fulgentes, quamuis sine sanguinis effusione, non tamen sine periculis & labore ac voluntate parata pro conseruanda sacri euangelii auctoritate moriendo, ad cælestem gloriam peruenere: vt Gregorii, Damasi, Leones, Innocentii, Bonifacii, Benedicti, & alia nomina, inter quæ tertius claruit Eugenius, ex monasterio sancti Anastaſii ad summum sacerdotium euocatus: ad quem diuus Bernardus monachorum pater, non minus doctrinæ fulgore quam vitae sanctimonia illustris, inter multa, huiusmodi verba conscripsit: Indagemus,

inquit, adhuc diligentius quid sis, quam geras videlicet personam pro tempore in ecclesia Dei. Tu es sacerdos magnus, tu summus pontifex, tu princeps episcoporum, tu heres apostolorum, tu primatu Abel, gubernatu Noe, patriarchatu Abraham, ordine Melchisedec, dignitate Aaron, auctoritate Moyses, iudicatu Samuel, potestate Petrus, vocatione Christus. Tu es, cui claves traditæ, cui oves creditæ sunt. Sunt & alii quidem cœli ianitores & gregum pastores: sed tu tanto gloriosius, quanto & differentius vtrumque præ illis nomen hereditasti. Habent illi assignatos sibi greges, singuli singulos: tibi vniuersi crediti vni sumus. Nec modo ouium, sed & pastorum tu vnum omnium pastor. Hæc Bernardus ad Eugenium tertium scribit, cui supremam & omnimodam in ecclesia potestatem concedit. Quod ille de tertio testatur Eugenio, hoc nos de quarto & omnibus aliis Romanis pontificibus profitemur, quia dignitatis est auctoritas. Liquet igitur, vnum in ecclesia caput esse & vnum principem: quia pax populi ex uno rectore dependet, & pluralitas principum discordiam parit. Christus ecclesiæ suæ in ultimo testamento pacem reliquit, & pacem multis verbis commendauit. Dedit ergo & regimen pacis amicum, id est, monarchicum, sub beato Petro & successoribus eius administrari cuncta præcipiens, clauibus illi commissis, & cura gregis demandata. Hæc nos de Romani pontificis auctoritate & potestate sentimus, cui & congregare generalia Concilia, & dissoluere datum est. Qui etsi filius est propter regenerationem, propter dignitatem tamen pater habetur: & * sicuti filiationis causa venerari debet ecclesiam tamquam matrem, ita & prælationis causa * præfertur ei, vt pastor gregi, princeps populo, rector familiae. Cum his & generalis Concilii auctoritatem & potestatem complectimur, quemadmodum & a uxorio nostro Constantiæ, dum ibi fuit Synodus vniuersalis, declaratum definitumque est. Veneramus enim Constantiense Concilium, & cuncta quæ præcesserunt, a Romanis pontificibus nostris predecessoribus approbata: inter quæ nullum inuenimus vñquam fuisse ratum, quod stante Romano indubitato præfule, absque ipsius auctoritate conuenerit: quia non est corpus ec-

Liber. 14.
C iiij

* sicut
propter
regene-
rationis
causam
* præf

clesiæ sine capite , & omnis ex capite defluit in membra potestas. Hæc nostra sententia est, filii, hæc credimus & profitemur: hæc iam senes, & in apostolatus apice constituti, pro veritate asserimus. Si quæ vel vobis, vel aliis conscripsimus aliquando, quæ huic doctrinæ repugnant, illa tamquam erronea, & iuuenilis animi parum pensata iudicio, reuocamus atque omnino respuimus.

Datum Romæ apud sanctum Petrum sexto Kalendas Maias, anno 1463.

CONVENTVM ILLVM MANTVANVM , QVO auctore Pio pontifice in præsentia plurimorum regum, principum vel legatorum , actum est de bello contra Turcas suscipiendo , recentiores Concilium esse volunt: sed immerito ; tum quod vix unus episcopus interfuisse legatur; tum etiam quod Platina & Chalcocondylas vnius temporis scriptores , non aliter quam conuentum appellant. Non dubito quin Genebrardus in posteriore editione suæ chronologiæ hac de causa sustulerit Concilium Mantuanum , quod in priore editione sub Pio II. collocatum inuenitur.

VITA
PAVL I PAPÆ II.

ANNO
CHRISTI
1464.

Quando
pontifex
factus.

Platina cur
a Paulo in-
carceratus.

PAVLVS nobili genere ortus, Petrus cognomento Barbus antea vocatus, ab Eugenio auunculo per varios honorum gradus ad cardinalatum euectus, Pio mortuo, pridie Kalendas Septembbris pontifex creator, Friderico III. imperante. Abbreviatores , vt vocant, a Pio in curiam adscitos officio priuauit, inter quos Platina, quod insolentius epistola quadam factum redarguisset, in custodiā detrusus est. Paulus canonicos in basilica Lateranensi collōcatos , & a Callisto eiectos , restituit. Legatos ad principes misit, eosque, licet frustra, cohortatus est ad bellum inferendum Turcis , qui vniuersa iam Epiro in potestatem redacta , in Illyricum irruptionem faciebant. Regis Fernandi copiis adiutus , Deiphobum & Franciscum Anguillariæ oppressit , eosque tamquam ecclesiæ hostes nouem castellis spoliauit. Hinc ad contentionem

venit cum Fernando rege , quod is ob officium præstum pontifici plures sibi annuos census remitti postulabat. Episcopum Conchensem Mediolanum misit , qui vrbem illam erga Galeatum Francisci Sfortiæ nuper mortui filium in fide contineret. Magnum Rhodiorum militum magistrum Romam vocavit , vt eius rem pene labantem adiuuaret. Quo Romæ mortuo , Carolum Vrsinum in eius locum subrogauit. Post diurna bellorum dissidia , multos Italix principatus inter se conciliauit. Hinc ad hilaritatem declinans , veterum imitatione populo ludos & spectacula edidit , epulumque dedit. Fredericum Cæsarem , Romam ex voto venientem , apparatissime suscepit. Idem Borso præsttit , quem Ferrariæ ducem creauerat. Hungaros & Germanos in Georgium Bohemiæ regem perfidum hominem commouit , ex quo regia omnino domus deleta est. In Tolphæ dominos bellum suscepit : quo infeliciter gesto , oppidum decem & septem millibus aureorum mercatus est. Obiit apoplexiæ morbo anno Domini 1471. octauo Kalendas Augsti , cum sedisset annos sex , menses decem & dies viгинissex. Hic cardinalibus purpuratas vestes , & quidem ornatores , dedit. Aedes ad sanctum Marcum & Vaticanas magnificentissimas ædificauit cardinalibus & episcopis tenuioris fortunæ. Virginibus , viduis , valetudinariis opem liberaliter præsttit. Annonæ curam sollicitorem gessit , preciosissimis gemmis mirum in modum oblectatus est. Paululum difficilis in agendo habitus , grauiter in flagitosos animaduertit , suos audaces nimium & insolentes non tulit. Floruit ea tempestate Dionysius Carthusianus , tot excellentium librorum auctor , de quo illud aliquando testimonium protulit Eugenius : Latetur mater ecclesia , quæ talem habet filium. De Platina , qui vitam Pauli secundi animo hostili & offenso magis quam historice describit , recte illud a quodam Papiensi scriptum existimamus : Platinæ quidem quis non ignoscat , si sit iratus ?

VITA ET DECRETA
SIXTI PAPÆ IV.

ANNO
CHRISTI
1471.

Sixtus quā-
do papa fa-
ctus. **S**IXTUS ex nobili gente Ruuerea oriundus, & Franciscus antea nominatus, patriam relinquens, venit Patavium, ibique per vigintiquinque annos moratus, a Paulo II. Bessarionis Nicæni cardinalis rogatu ex ordinis Minorum generali ministro cardinalis factus, post obitum Pauli creatus est pontifex maximus anno Domini 1471. quinto Idus Augusti, tempore Friderici III. imperatoris. Cardinales quatuor legatos delegit: quorum tres ad reges Galliæ, Hungariæ & Aragoniæ misit, ut ad pacem eos cohortarentur: quartum, post fœdus cum Fernando rege & Venetis initum, maritima classe in Turcas armavit. Sed vterque conatus irritus cecidit. Dehinc ut quorumdam tyrannorum Umbriæ audaciam compri-
meret, Fernandi regis auxiliaribus copiis Federicum, antea Montisfeltrii comitem, deinde a se grandiori no-
mine Vrbini ducem appellatum, præfecit, quibus & Iu-
lianum nepotem cardinalem præposuit. Perfecutus est Laurentium & Julianum Mediceos fratres, ex quo bel-
lum intulit Florentinis. Initia societate cum Venetis, &
Roberto Malatesta exercitus sui duce creato, Calabriæ
ducem prælio fudit. Conciliato sibi rege Neapolis, arma
in Columnenses vertit. A Venetorum amicitia se sub-
trahens, sacris interdixit, & aduersus eos cum aliis prin-
cipibus societatem iniit. Liberale hospitium præbuit Pa-
läologo Peloponnesi domino, despotæ Epiri, reginis
Cypri ac Bossinæ, qui Turcarum armis profugi, patriis-
que bonis spoliati, fese omnes eo contulerant. Idem quo-
que officium exhibuit Christierno Danorum regi, qui
pari honore Sextum prosecutus est, eique in cubiculum
redeunti exeuntique semper adfuit, lauantique manus
peluum præbuit. Idem quoque præstítit Fernando, duci-
busque Calabriæ & Saxonie, qui Romam pietatis stu-
dio venerant. Census Fernando remisit, dum tamen quot-
annis loco census equum egregie instructum phalera-
rumque persolueret. Beatum Bonauenturam in sancto-
rum

rum catalogum retulit. Festis solennibus etiam diem conceptionis, præsentationis beatæ virginis, sanctæ Annæ, Iosephi & Francisci adscripsit. Annum Iubilæi ad vigesimumquintum annum rededit. Cauit edicto, ne porphyretici lapides, neve marmorei ad profanos usus e templis tollerentur. Ut Franciscani & Dominicani pacifice viuerent, decreuit de conceptione Virginis quamlibet aduersantium opinionum sine heresis vitio sustineri posse. Catholici regis nomen Ferdinando & Isabellæ tribuit, officiumque inquisitionis in Hispania collocauit. Petrum affinem cardinalem sancti Sixti creauit. Hieronymo Forum Liuui dedit, Antonio Ordelafo ademptum; & effecit, ut dux Insubrum Catharinam naturalem filiam & Imolam ei in dotem daret. Sed infelicem habuit exitum vitæ. Occisus quippe est domi suæ in oculis Catharinæ vxoris. Sextus ad ornatum elegantiamque conuersus, urbem pulcerimis elegantissimisque operibus excolere cœpit, vias latitudines sternere, eaque loca reformare, quæ tenebrisca aut humida nimium, aut deformem ciuitatem, aut insalubrem reddebant; pontem sui nominis extruere, aquæ virginis ductum corriuare, celeberrimam Vaticani bibliothecam libris vndique conquisitis erigere. Ingens ecclesiæ propugnator, generosæ indolis, liberalis, excelsi animi fuit. Primus venalia habuit curiæ officia, & noua ad lucrum excogitauit. Nonnulla conscripsit, quæ apud eruditos viros in precio sunt. Obiit septuagenarius, podagra aliisque curis vexatus, & sepultus est in Vaticano, anno Domini 1484. pridie Idus Augusti, cum sedisset annos tredecim, & dies quatuor.

Candido lectori, F. Laurentius Surius.

Hoc loco adscribenda putauimus, quæ Sixtus quartus pontifex maximus de conceptione sacratissimæ virginis Mariæ promulgavit & sanxit, quemadmodum in extrauagantibus lib. 3, tit. de reliquiis & veneratione sanctorum leguntur, propterea quod Synodus Tridentina Sixti huius sententiam secuta est. Verba Synodi eius hæc sunt sessione 5. *Declarat tamen hac ipsa sancta Synodus, non esse sua intentionis, comprehendere in hoc decreto, ubi de peccato originali agitur, beatam & immaculatam virginem Mariam Dei genitricem, sed observandas esse constitutiones felicis recordationis Sixti pape quarti sub pennis in eius constitutionibus contentis, quas innouat hec Synodus.* Ipsius igitur Sixti pontificis, ne longius ea, lector, petere cogaris, verba sub-

Concil. Tom. 34.

D

iicimus , & primo quidem de festi conceptionis celebratione,
deinde de pœnis in eo constitutis , qui conceptionem ipsam op-
pugnant.

DECRETVM
SIXTI IV. PONTIFICIS
MAXIMI.

De festo conceptionis immaculatæ virginis Mariæ.

CVM præexcelsa meritorum insignia , quibus regina cælorum , virgo Dei genitrix gloriofa , sedibus prælata æthereis , sideribus quasi stella matutina perrutilans , deuotæ considerationis indagine perscrutamur , & infra pectoris arcana reuoluimus , quod ipsa , vtpote via misericordiæ , mater gratiæ & pietatis amica , humani generis consolatrix , pro salute fidelium , qui delictorum onere grauantur , sedula oratrix & peruigil ad regem quem genuit , intercedit : dignum , quin potius debitum reputamus , vniuersos Christi fideles , vt omnipotenti Deo , (cuius prouidentia eiusdem virginis humilitatem ab æterno respiciens , pro concilianda suo auctori humana natura , lapsu primi hominis æternæ morti obnoxia , eam sui vñigeniti habitaculum sancti Spiritus præparatione constituit , ex qua carnem nostræ mortalitatis pro redemptione populi sui assumeret , & immaculata virgo nihilo minus post partum remaneret :) de ipsius immaculatæ virginis mira conceptione gratias & laudes referant , & institutas propterea in ecclesia Dei Missas & alia diuina officia dicant , & illis interfint , indulgentiis & peccatorum remissionibus inuitare , vt exinde fiant eiusdem virginis meritis & intercessione diuinæ gratiæ aptiores . Hac igitur consideratione inducti , eiusdem omnipotentis Dei ac beatorum Petri & Pauli apostolorum eius auctoritate confisi , auctoritate apostolica hac in perpetuum valitura constitutione statuimus & ordinamus , quod omnes & singuli Christi fideles vtriusque sexus , qui Missam & officium conceptionis eiusdem virginis gloriofæ , iuxta piam , deuotam & laudabilem ordinationem dilecti filii magistri Leonardi de Nogarolis clerici Veronensis , notarii nostri ; & quæ desuper a nobis emanauit , Missæ & officii huiusmodi institutionem , in die festi uitatis conce-

ptionis eiusdem virginis Mariæ , & per octauas eius deuote celebauerint & dixerint , aut illis horis canonicas interfuerint : quoties id fecerint , eamdem prorsus indulgentiam & peccatorum remissionem consequantur , quam iuxta felicis recordationis Urbani quarti in Concilio Vienensis ^{* f. ap-} probatæ , ac Martini quinti & aliorum Romanorum pontificum prædecessorum nostrorum constitutiones consequuntur illi , qui Missam & horas canonicas in festo corporis & sanguinis Domini nostri Iesu Christi a primis Vesperis , & per illius octauas iuxta Romanæ ecclesiæ constitutionem celebrant , dicunt , aut Missæ officio & horis huiusmodi intersunt , præsentibus perpetuis temporibus valituri. Datum Romæ apud sanctum Petrum , anno incarnationis dominicae 1476. Kalendis Martii , pontificatus nostri anno sexto.

ALIVD DECRETVM
SIXTI IV. PONTIFICIS
MAXIMI.

De eadem conceptione Virginis matris.

GRAVE nimis gerimus & molestum , cum sinistra nobis de quibusdam ecclesiasticis personis referuntur. Sed in eorum qui ad euangelizandum verbum Dei sunt deputati , excessibus prædicando commissis eo grauius prouocamur , quo illi periculosius remanent incorrecti : cum facile deleri nequeant , qui multorum cordibus sic publice prædicando diffusius & damnabilius imprimuntur errores . Sane cum sancta Romana ecclesia de intermerata semperque virginis Mariæ conceptione publice festum solenniter celebret , & speciale ac proprium super hoc officium ordinauerit , nonnulli , vt accepimus , diuersorum ordinum prædicatores in suis sermonibus ad populum publice per diuersas ciuitates & terras affirmare haetenus non erubuerunt , & quotidie prædicare non cessant , omnes illos qui tenent aut afferunt eamdem gloriosam & immaculatam Dei genitricem absque originalis peccati macula fuisse conceptam , mortaliter peccare , vel esse haereticos : eiusdem immaculatae conceptionis officium celebrantes , audientesque sermones illorum qui

Concil. Tom. 34.

D ij

28 SEXTI PAPÆ IV. DECRETA.

eam sine huiusmodi macula conceptam esse affirmant, peccare grauiter. Sed & præfatis prædicationibus non contenti, confectos super his suis assertionibus libros in publicum ediderunt, ex quorum assertionibus & prædicationibus non leuia scandala in mentibus fidelium exorta sunt, & maiora merito exoriri formidantur in dies. Nos igitur huiusmodi temerariis ausibus ac peruersis assertiōnibus ac scandalosis, quæ exinde in Dei ecclesia exoriri possunt, quantum nobis ex alto conceditur, obuiare volentes, motu proprio, non ad alicuius nobis super hoc oblatæ petitionis instantiam, sed de nostra mera deliberatione & certa scientia, huiusmodi assertions prædicatorum eorumdem, & aliorum quorumlibet, qui affirmare præsumerent, eos qui crederent aut tenerent, eamdem Dei genitricem ab originalis peccati macula in sua conceptione præseruatam fuisse, propterea alicuius hæresis labे pollutos fore, vel mortaliter peccare; aut huiusmodi officium conceptionis celebrantes, seu huiusmodi sermones audientes, alicuius peccati reatum incurrire; vt pote falsas & erroneas, & a veritate penitus alienas, editosque de super libros prædictos id continentes, quoad hoc, auctoritate apostolica tenore præsentium reprobamus & damnamus, ac motu, scientia & auctoritate prædictis statuimus & ordinamus, quod prædicatores verbi Dei, & quicumque alii, cuiuscumque status, gradus aut ordinis ac conditionis fuerint, qui de cetero ausu temerario præsumperint in eorum sermonibus ad populum, seu alias quomodolibet affirmare, huiusmodi sic per nos improbatas & damnatas assertions veras esse, aut dictos libros pro veris legere, tenere vel habere, postquam de præsentibus scientiam habuerint, excommunicationis sententiam eo ipso incurrant, a qua ab alio quam a Romano pontifice (nisi in mortis articulo) nequeant absolutionis beneficium obtainere. Item motu, scientia & auctoritate similibus, simili poenæ ac censuræ subiicientes eos qui ausi fuerint asserere, contrariam opinionem tenentes, videlicet gloriosam virginem Mariam cum originali peccato fuisse conceptam, hæresis crimen vel peccatum incurre mortale, cum nondum sit a Romana ecclesia & apostolica sede decisum: non obstantibus constitutionibus & ordi-

nationibus apostolicis contrariis quibuscumque, quibus
communiter vel diuīsim a sede apostolica indultum exi-
stat, quod interdici, suspendi vel excommunicari non
possint per literas apostolicas non facientes plenam ac
expressam, ac de verbo ad verbum de indulto huiusmo-
di mentionem. Et ne de præmissis aliquando valeant i-
gnorantiam allegare, volumus, quod locorum ordinarii
requisiti præsentes literas in ecclesiis consistentibus in
eorum ciuitatibus & suarum dioecesum locis insignibus,
dum maior ibi multitudo populi ad diuina conuenerit,
sermonibus ad populum mandent & faciant publicari.
Præterea quia difficile foret præsentes literas ad singula
loca, in quibus expediens fuerit, deferre: etiam volumus,
& dicta auctoritate decernimus, quod earumdem litera-
rum transumpto manu publici notarii confecto, & au-
thentico alicuius prælati ecclesiastici sigillo munito, vbi-
que stetur, prout staretur eisdem originalibus literis, si
forent exhibitæ vel ostensa. Nulli ergo omnino homi-
num liceat hanc paginam nostræ reprobationis, damna-
tionis, statuti, ordinationis, voluntatis & decreti infringere,
vel aī ausū temerario contraire. Si quis autem hoc
attentare præsumperit, indignationem omnipotentis Dei
& beatorum Petri & Pauli apostolorum eius se nouerit
incursurum. Datum Romæ apud sanctum Petrum anno
incarnationis dominicæ 1483. pridie Nonas Septembris,
pontificatus nostri anno decimotertio.

ANNO CHRISTI 1483.
CONCILIVM TOLETANVM
IN OPPIDO QVODAM HISPANIÆ
de Aranda, ad reformandos cleri populique mores
celebratum anno Domini MCCCCLXXIII.
tempore Sixti papæ IV.

TITVL I CAPITVLORVM.

- I. *Quod archiepiscopi prouincialia
in biennio, & episcopi synodalia
annuatim saltem Concilia cele-
brent.* beant in scriptis articulos fidei
&c. & publicent populo.
II. *Quod rectores ecclesiarum ha-*
III. *Quod non promoueantur ad
sacros ordines non scientes loqui
latiniliter.*